



UNIVERSITÄTS-
BIBLIOTHEK
PADERBORN

Universitätsbibliothek Paderborn

**R. P. Joannis Nadasi, è Societate Jesu, Annus Caelestis,
Jesu Regi, & Mariae Reginae, Sanctorum Omnium Sacer**

Anni Caelestis Dies, & Festa Mobilia

Nádasi, János

Coloniae Ubiorum, 1667

3 Aprilis. 3 Nonas April.

[urn:nbn:de:hbz:466:1-53527](https://nbn-resolving.org/urn:nbn:de:hbz:466:1-53527)

linqueres monita, paruisti; & trigesimo post die, MARIÆ, ad te in agone cum Virginibus venienti, & ad cælum invitanti, acclamasti: *Ecce, Domina, venio; ecce, Domina, venio; & abiisti.*

OMNES SANCTI, &c. pag. 320.

S. MARIA, *cujus imaginem, septemdecim aureorum millibus æstimatam, à Ludovico XI Rege, dono oblatam, accipere noluit hodiernus tuus S. Franciscus de Paulâ: aufer à me omnem, etiam in pijs rebus, vanitatem; ut te colam, ita ut colî vis: prout illi coluerunt, qui te optimè coluerunt!*

S. MARIA, *quæ de Arnulpho puero, ut ad religiosum Ordinem reciperetur, Guilielmo Villariensi conspecta, dixisti: Sinè morâ recipe illum; quia vas electionis est mihi. Fac me vas electionis tibi: recipe me in album tuorum!*

3 Aprilis. 3 Nonas April.

S. Joseph Poëta sancte, cælestis hymnographe, cui in Cretenfi carcere vincto S. Nicolaus Myrensis Ep. apparuit; Christi persecutorem, mortuum esse dixit; te Constantinopolim proficisci, ad multos

V con-

confirmandos, iussit; libelli cæle-
 stis particulam tibi comedendam
 porrexit, cui inscripta erant hæc di-
 vina verba: *Accelera misericors, festi-
 na miserator, adjutorium nostrum
 quoniam volens potens es.* hæc te ca-
 nere iussit, libellumque comedere
 id quod ubi tu fecisti, vinculis tibi
 de manibus, & collo cadentibus,
 Constantinopolim repente liber
 translatus es. Qui acquisitis S. Bar-
 tholomæi, dilecti tui Apostoli, sa-
 cris lipsanis, cum iis mira patri
 videres, templum Deo, S. Bartho-
 lomæi nomine, condidisti. & Bar-
 tholomæus tuus tibi, dilecto clien-
 ti suo, sæpè conspectus per quie-
 tem, aperiebat tibi cælestia myste-
 ria, ac Scripturæ nodos explicabat.
 Cum verò desiderares illum dignis
 versibus celebrare; ut gratum car-
 men, amoris ac honoris ejus, pange-
 res, per quadraginta dies variè te
 afflicto, oransque ad Sancti ejus-
 dem reliquias, in ejus vigiliâ, eun-
 dem vidisti, qui templi valvas te-
 nens, te accivit, ac Evangelii librum
 in tuo sinu deponens, dixit: *Bene-
 dicat tibi præpotentis Dei manus: in-
 fluant in linguam tuam cælestis sapi-
 entia maria: fiat cor tuum sancti Spi-
 ritus sedes; tuique cantus universum*
 terra-

terrarum Orbem demulceant! Ita ille
 tunc evanuit. tua verò sancta poësis
 omnem somnum ac torporem à segni-
 bus pigrisque hominibus excutiebat.
 quâ docebas, quomodo quies ac tran-
 quillitas animi posset comparari. Qui
 mortis nuntio è cælo accepto, inter
 alia sic orâsti: *Benedico tibi, Deus;*
quoniam sub umbrâ alarum tuarum
me asservâsti! nunc ad extremum us-
que spiritum me custodi, ac presta, ut
tenebrarum principem inviolatus ef-
fugiam; ne quando gaudeat super me
inimicus meus, propter delicta vitæ
meæ. quo moriente vidit quidam,
Beatissimâ Virgine præeunte, ani-
mam tuam, puellæ instar, à quatuor
Angelis sursum ferri, qui dicebant
choris Sanctorum; acciperent animam
beatissimam illius, qui eorum rectè fa-
cta & vitam imitatus esset, & carmine
cecinnisset. Quo tempore omnes San-
cti illam incredibili latitiâ complecti
videbantur, eunte præ, purissimâ Dei
Genitrice, cujus tu fuisti hymno-
graphus MARIANUS. Dicebant de te
tunc Angeli: Hic est Iosephus, totius
Ecclesiæ decus, & ornamentum, qui
Apostolorum, Martyrûmque res gestas
& amulatus fuerit, & literis com-
mendaverit, sancti Spiritûs gratiâ do-
natus: nunc ei ab iisdem laudum ho-

*norumque vices rependuntur : ne
 quisquam in amplissimis cali atris re-
 liquus factus est, quin suarum virtu-
 tum praconi, amulatorique obviam
 processerit, nam omnes caelestium vir-
 tutum ordines, magnâ cum venera-
 tione, te complectebantur. praebant
 principes Apostolorum, consequebantur
 Martyres, deinceps Propheta, co-
 rumque exercitus, qui sanctè pieque
 in Pontificatu vitam duxere. Ita tibi
 S. Bartholomæus, tuus Apostolus,
 felicitatem sacrae poësis ac sancto-
 rum versuum dedit; morienti verò
 Sancti omnes, & Sancta Dei, quos
 carmine aliquando celebraveras,
 adfuere. Adsis, unâ cum illis, et tu
 mihi morienti; & fac, ut Sanctos
 omnes ita hîc colam, ut, unâ cum
 illis, laudet Deum meum omnis
 cogitatio mea, locutio mea, scri-
 ptio mea, omnis actio mea, vita
 mea, mors mea, æternitas mea.
 Amen.*

*S. Pancrati Ep. M. cujus episto-
 la, ex idoli collo suspensa, illi silen-
 tium indixit. qui cum loquereris,
 ignes ore jaculari dicebaris, caelestia
 loquens (ut de te scribitur) suavissi-
 mis mellitissima lingua verbis. unde
 plurium cordibus fidem inscripsisti
 divina lingua calamo, quem Spiritus
 sanctus,*

sanctus, dexteræ Dei digitus, dirigebat. postea, ob eandem fidem, moribus, fustibus, lampadibus, gladiis obruncate. Doce me tacere, doce loqui divina.

Sancti Evagri, & Benigne, MM.

Sanctæ Agape, & Chionia Virgines, quæ, à flammis intactæ, in oratione Deo animas reddidistis.

S. Bernarde Archiep. Primas Hispaniæ, divinæ Matris honori undequaque addictæ.

S. Vulpiane, cum aspide & cano, culeo insute, & in mare demerse.

S. Niceta, qui nugas omnes & facetias à tuo cœnobio penitus proscripsisti; *hæc enim, aiebas, odit Spiritus sanctus*: instituisti autem, ut ibidem quotidie, partitè, ita totum psalterium recitaretur, ut perpetua in eo loco esset oratio: qui religiosam disciplinam cœnobio, mentem deliro, muto loquendi facultatem restituiisti: ad quem iturus juvenis (ut dæmonis, qui eum à religionis desiderio abstrahere nitebatur, insidias aperiret) vidit ante tuum conclave dæmonem, serpentis specie, se volutantem, & ne ad te posset ingredi prohibentem; at tu & dæmonem fugasti, & juvenem in desiderio sancto firmasti, atque à vexatore

illo improbo liberâsti. Libera et me; ne ab occulto aliquo dæmonio abstrahar ab iis, ad quæ divino instinctu inuitor: doce me semper sine intermissione orare, & nunquam deficere: fac, ut ea omnia semper caveam, quæ odit *Spiritus sanctus*, faciam verò, quæ amat.

S. Richarde Episc. qui pane uno, mirè multiplicato, tria pauperum millia satiâsti; & ea, quæ supererant fragmenta, centum aliis suffecere; idque non semel factum: qui cilicio, & loricâ te afflicans, mortem obiisti in amplexibus Crucifixi.

S. Burgundofora Virgo, quæ, cum tuis Monialibus, Monialem à mortuis ad vitam resurgentem, & post triduum, canentibus Angelis, morientem vidisti: quam bene mouentem audire nolentes duæ Novitiæ, te illis confessionem seriam suggerente, respondebant: *Cras, Cras*; & in morbo extremo agebant, se ab Æthiopibus expectari; post mortem verò, & ignis earum sepulchro visus est imminere, & hæc voces auditæ: *Va mihi! va mihi!* cùmque sepulchrum aperiri iussisset, earum corpora reperta non sunt; sed cineres in sepulchro exulto.

usto. Impetra mihi cor contritum;
& ut ita vivam, prout viverem, si
à morte ad vitam rediissem.

S. FRANCISCA, cui sub Dei throno
ignis, id est, amor, hoc die ostensus
est, voce ab igne profectâ: Habe cor
præparatum. exulta in magnâ abyssso
amoris. esto attenda, quando ab illo
vocaberis. Imple me igne illo: &
perfice aures meas, ut vocem ignis
illius, mihi per inspirationes ad cor
loquentis, obedienter audiam.

OMNES SANCTI, &c.
pag. 320.

S. MARIA, Mater gratiæ, Mater
misericordiæ! quæ nomina, hoc die
sua mortis, repeti sibi sæpè voluit San-
ctus tuus Richardus Episcopus. Fac
mecum etiam, quod ille sibi petivit; &
tu me ab hoste protege, ac horâ mortis
suscipe!

S. MARIA, cujus imago, cum Cru-
ce, ac JESU Filii tui imagine, à S.
Pancratio Ep. è muris Tauromenien-
sis Urbis, ab Ethnicis obfessa, ostentata,
libertatem Urbi, & victoriam attulit,
hostibus in mutuam cadem versis. Sim
ego Urbs tua, cujus muros custodias,
ac defendas, & cui à Filio tuo impetres
certum, etiam ex ipsâ tentatione, pro-
ventum!